



CONVENIO DO PARLAMENTO DE GALICIA COA UNIVERSIDADE DE SANTIAGO DE COMPOSTELA PARA A REALIZACIÓN DE PRÁCTICAS ACADÉMICAS EXTERNAS CURRICULARES Y EXTRACURRICULARES DOS ESTUDANTES DA FACULTADE DE DEREITO

Na nova ordenación das ensinanzas universitarias derivada da adaptación ao espazo europeo de educación superior (EEES) ponse unha especial énfase na realización por parte dos estudantes de grao e máster de prácticas externas con valor académico en entidades públicas ou privadas, nacionais ou internacionais, desde a consciencia de que a combinación dunha axeitada formación teórica universitaria co coñecemento aplicado das técnicas e das metodoloxías desenvolvidas no campo profesional constitúe a base máis sólida para a súa formación integral, ao capacitalos correctamente para a súa futura inserción no mercado laboral.

Por este motivo

COMPARECEN

A Excm. Sra. D.^a Pilar Rojo Noguera na súa condición de presidenta do Parlamento de Galicia, actuando ao abeiro das facultades que lle confire o artigo 31.1 do Regulamento da Cámara do Parlamento de Galicia, con sede na rúa do Hórreo, Santiago de Compostela.

Por outra, D. Juan Viaño Rey, reitor magnífico da Universidade de Santiago de Compostela, con sede no Pazo de San Xerome, que actúa en nome e representación da institución segundo o establecido no artigo 20 da Lei 6/2001 de 21 de decembro de Universidades e no Decreto 62/2014, de 28 de maio, da Xunta de Galicia.

Ambas as entidades recoñécense respectivamente personalidade, capacidade e competencia para outorgar este convenio, polo que



ACORDAN

O establecemento dun convenio de colaboración educativa para a realización de prácticas académicas externas curriculares e extracurriculares, de conformidade ca Normativa de Prácticas Académicas Externas da USC, aprobado polo seu Consello de Goberno do 30 de maio de 2008, e as seguintes

CLÁUSULAS

PRIMEIRA. Obxecto

Este convenio ten por obxecto posibilitar aos estudantes das titulacións de grao (Grao en Dereito) e máster universitario impartidos na Facultade de Dereito da Universidade de Santiago de Compostela a realización de Prácticas Externas correspondentes establecidas no respectivo Plan de estudos, e prácticas extracurriculares, tendo preferencia as curriculares sobre as extracurriculares, dentro dos programas de cooperación educativa promovidos pola entidade colaboradora Parlamento de Galicia (en diante, a Institución).

SEGUNDA. Beneficiarios

Poderán ser beneficiarios deste programa aqueles estudantes matriculados nalgunha titulación da Facultade de Dereito, de conformidade co plan de estudos correspondente.

Non poderán ser beneficiarios deste programa os estudantes que manteñan algunha relación contractual coa Institución, agás autorización obtida de acordo coa normativa interna da Universidade de Santiago de Compostela.

TERCEIRA. Duración das prácticas

A duración das prácticas académicas externas curriculares será a que estableza o plan de estudos oportuno, dentro do marco previsto polo art. 12.6 do Real decreto 1393/2007, do 29 de outubro, polo que se establece a ordenación das ensinanzas universitarias oficiais (BOE nº 260, do 30 de outubro), ou norma xeral posterior que o substitúa.

As prácticas extracurriculares terán unha duración preferentemente non superior ao cincuenta por cento do curso académico.

CUARTA. Obrigas e dereitos dos estudantes

Durante a realización das prácticas, *o/a* estudante comprometerase a cumprir as condicións concretas establecidas; a realizar as actividades que o Parlamento de Galicia lle encomende dentro do proxecto formativo fixado; a respectar os regulamentos e as normas da Institución; a gardar unha absoluta confidencialidade sobre os acontecementos e os documentos da Institución (mesmo unha vez finalizada a estadía de prácticas) e a manter o contacto cos seus titores.

Aos estudantes garantiránselles, en todo caso, os dereitos seguintes:

- a) A tutela, durante o período de duración da correspondente práctica, por un profesor da universidade e por un profesional que preste servizos no Parlamento de Galicia.
- b) A avaliación, de acordo cos criterios establecidos pola universidade.
- c) Á obtención dun informe por parte da Institución, con mención expresa da actividade desenvolvida, á súa duración e, se é o caso, ao seu rendemento.
- d) A recibir, por parte da Institución, información da normativa de seguridade e prevención de riscos laborais.
- e) A cumprir coa súa actividade académica, formativa e de representación e participación, logo de comunicación con antelación suficiente á Institución.
- f) A dispor dos recursos necesarios para o acceso dos estudantes con discapacidade á tutela, á información, á avaliación e ao propio desempeño das prácticas en igualdade de condicións.
- g) A conciliar, no caso dos estudantes con discapacidade, a realización das practicas con aquelas actividades e situacións persoais derivadas ou conectadas coa situación de discapacidade.

Unha vez finalizado o seu período de prácticas, *o/a* estudante terá que elaborar

unha memoria final de que fará entrega ao titor ou a titora académico/a. Na devandita memoria final deberá recollerse a seguinte información:

- a) Datos persoais do/a estudante.
- b) Entidade colaboradora na que realizou as prácticas e localización do centro no que as desenvolveu.
- c) Descrición concreta e detallada das tarefas e os traballos desenvolvidos, así como dos departamentos da Institución.
- d) Valoración das tarefas executadas e dos coñecementos e competencias adquiridos en relación cos estudos universitarios.
- e) Relación dos problemas xurdidos e procedemento seguido para a súa resolución.
- f) Identificación das adquisicións que, en materia de aprendizaxe, supuxeron as prácticas.
- g) Avaliación das prácticas e suxestións de mellora.

QUINTA. Obrigas do Parlamento de Galicia.

O Parlamento de Galicia comprométese a desenvolver o proxecto formativo que efectuarán os estudantes, e respectar os dereitos dos estudantes relativos á protección dos seus datos de carácter persoal. En todo caso, o proxecto formativo ha de ser conforme aos principios de inclusión, igualdade de oportunidades, non-discriminación e accesibilidade universal.

As tarefas que realizarán os estudantes en prácticas estarán relacionadas co seu nivel de estudos e de formación académica.

Finalizadas as prácticas, a Institución expedirá ao ou á estudante un certificado acreditativo da súa realización e das súas características. Alén disto, remitirá debidamente cuberto ao centro o informe de seguimento final das prácticas.

A realización deste convenio non supón contraprestación económica ningunha para o Parlamento de Galicia.

SEXTA. Obrigas da Universidade

A Facultade de Dereito da Universidade de Santiago de Compostela comprométese a convocar, difundir entre o seu estudiantado e tramitar as ofertas de prácticas que reciba da Institución no marco deste convenio.

SÉTIMA. Relación entre o Parlamento de Galicia e os estudantes en prácticas

A realización das prácticas non xera ningunha relación xurídica, civil nin laboral, entre o Parlamento e os alumnos, que non percibirán da Cámara ningún tipo de retribución pola súa actividade e manterán cuberta a súa asistencia médica, farmacéutica e hospitalaria co Seguro Escolar.

Os alumnos respectarán en todo momento a vida institucional e administrativa do Parlamento.

A Institución poderá interromper as prácticas cando considere que o/a estudante vulnerou gravemente as súas obrigas, o que lle comunicará ao ou á representante da

Facultade de Dereito.

Se *o/a* estudante se incorporase á Institución ao rematar os seus estudos, o tempo de prácticas non se computará para os efectos de antigüidade, nin eximirá do período de proba, agás que o convenio colectivo de aplicación estipule algo distinto.

OITAVA. Tutores

Os estudantes en prácticas que se acolleren a este programa disporán dunha titoría académica e outra profesional.

O titor ou a titora académico/a será un/ha profesor/a do centro, mentres que o titor ou a titora profesional será un/ha profesional da Institución.

Os dous tutores supervisarán as funcións levadas a cabo polos estudantes durante as súas prácticas, asistirános no que fora necesario e avaliarán o aproveitamento das prácticas.

Os tutores académicos e profesionais poderán obter da Universidade de Santiago de Compostela o recoñecemento da súa actividade de conformidade coa normativa interna de aplicación.

Os tutores profesionais e académicos terán os seguintes dereitos:

- a) Ao recoñecemento da súa actividade colaboradora, por parte da Universidade, nos termos previstos no presente convenio de cooperación educativa e no Regulamento de Prácticas da Universidade de Santiago de Compostela.
- b) A ser informado acerca da normativa que regula as prácticas externas así como do proxecto formativo e das condicións do seu desenvolvemento.
- c) Ter acceso á Universidade para obter a información e o apoio necesarios para o cumprimento dos fins propios da súa función.

Os tutores profesionais deberán cumprir as obrigas seguintes:

- a) Acoller o estudante e organizar a actividade que vai desenvolver de acordo co establecido no proxecto formativo.
- b) Supervisar as súas actividades, orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
- c) Informar ao estudante da organización e do funcionamento da Institución, así como da normativa de interese, especialmente a relativa á seguridade e riscos laborais.
- d) Coordinar co titor académico da Universidade o desenvolvemento das actividades establecidas no convenio de cooperación educativa, incluíndo aquelas modificacións do plan formativo que poidan ser necesarias para o normal desenvolvemento da práctica, así como a comunicación e resolución de posibles incidencias que poidan xurdir no seu desenvolvemento e o control de permisos para a realización de exames.
- e) Emitir os informes que corresponda.
- f) Proporcionar a formación complementaria que precise o estudante para a realización das prácticas.

- g) Proporcionar ao estudante os medios materiais indispensables para o desenvolvemento da práctica.
- h) Facilitar e estimular a achega de propostas de innovación, mellora e emprendemento por parte do estudante.
- i) Facilitarlle ao titor académico da Universidade o acceso á Institución para o cumprimento dos fins propios da súa función.
- j) Gardar confidencialidade en relación con calquera información que coñeza do estudante como consecuencia da súa actividade como titor.
- k) Prestar axuda e asistencia ao estudante, durante a súa estadía na Institución, para a resolución daquelas cuestións de carácter profesional que poida necesitar no desempeño das actividades que realiza nela.

O titor ou a titora académico/a terá as seguintes obrigas:

- a) Velar polo normal desenvolvemento do proxecto formativo, garantindo a compatibilidade do horario de realización das prácticas coas abrigas académicas, formativas e de representación e participación do estudante.
- b) Facer un seguimento efectivo das prácticas, coordinándose para iso co titor da Institución e vistos, se fora o caso, os informes de seguimento.
- c) Autorizar as modificacións que se produzan no proxecto formativo.
- d) Levar a cabo o proceso avaliador das prácticas do estudante tutelado, á vista da memoria final presentada polo/a estudante e o informe do titor ou a titora da Institución, mediante o correspondente informe.

NOVENA. Seguro Escolar

Os estudantes menores de 28 anos están cubertos polo Seguro Escolar obrigatorio que pagan coa matrícula. A maiores, a Institución poderá subscribir ao seu cargo un seguro adicional.

A responsabilidade civil de danos a terceiros que eventualmente puidesen ocasionarse quedará cuberta pola póliza que a Universidade de Santiago de Compostela ten subscrita para estes efectos.

DÉCIMA. Remisión aos anexos

Para cada práctica individual formalizaranse os anexos a este convenio, de acordo cos modelos que se achegan.

En cada anexo figurarán os datos do convenio de referencia; os datos persoais do ou a estudante; o lugar en que se realizarán as prácticas; o nome dos titores; as datas de inicio e fin das prácticas; o total de horas e a súa distribución temporal; o proxecto formativo obxecto das prácticas que levará a cabo o/a estudante; a posible bolsa ou axuda ao estudo e o tipo de seguro que dará cobertura ao ou á estudante.

As prácticas terán a validez académica que se lles outorgue no plan de estudos correspondente, no marco das Prácticas Externas/Prácticum, e incorporaranse ao Suplemento Europeo ao Título (SET), de conformidade coa normativa de aplicación, no

caso das prácticas extracurriculares. Cada anexo recollerá as materias, o número de horas e os créditos asignados, e será asinado polos estudantes, unha persoa representante da Institución e outra representante do centro.

En caso de incumprimento, a Institución poderá instar a rescisión anticipada das prácticas.

DÉCIMO PRIMEIRA. Comisión de Seguimento

Coa finalidade de asegurar o cumprimento deste convenio, crearase unha Comisión de Seguimento composta por un representante de cada unha das institucións asinantes, que coordinará o seu desenvolvemento e estará facultada para resolver cantas dúbidas puidesen xurdir na súa execución, e poderá estar asistida polos técnicos necesarios. Os acordos adoptados neste sentido serán inmediatamente executivos.

Terá ademais as seguintes funcións:

- 1º. A interpretación do convenio.
- 2º. A proposta de addendas ou modificacións ao mesmo.
- 3º. Formular as convocatorias correspondentes a cada curso académico para a realización do Prácticum de acordo cos criterios fixados polos responsables universitarios.
- 4º. Establecer os criterios de seguimento e avaliación dos programas do Prácticum.
- 5º. Determinar as dependencias onde se realizarán as actividades do Prácticum.
- 6º. A intervención previa á resolución por incumprimento, a coordinación de funcións e calquera outra relacionada co bo funcionamento deste convenio

DÉCIMO SEGUNDA. Resolución.

Serán causas de resolución do presente convenio:

- O mutuo acordo entre as partes.
- A denuncia de calquera das partes, formulada cun mes de antelación e causas xustificables.
- O incumprimento total ou parcial das cláusulas contidas neste convenio.

DÉCIMO TERCEIRA. Réxime Xurídico.

Este convenio ten natureza administrativa e rexerese pola Lei 30/92, do 26 de novembro, de réxime xurídico das administracións públicas e do procedemento administrativo común; de conformidade co establecido no seu artigo 8.3, as cuestións litixiosas que poidan xurdir na interpretación e cumprimento do presente convenio de colaboración serán de coñecemento e competencia da Orde xurisdiccional do contencioso-administrativo.

DÉCIMO CUARTA. Transparencia

A sinatura deste convenio supón o consentimento expreso de ámbalas partes para facer públicos a través dos diarios oficiais que procedan e das respectivas webs, os datos referidos ao convenio de conformidade coa normativa sobre transparencia e boas prácticas

que sexa de aplicación a cada unha delas.

DÉCIMO QUINTA. Vixencia

A duración deste convenio será dun ano académico, e renovarase automaticamente por iguais períodos de tempo mentres non for denunciado por algunha das partes, que o comunicará á outra por escrito e con cando menos dous meses de antelación á data de renovación.

No entanto, a denuncia do convenio non afectará ás prácticas que xa se viñesen realizando no momento de efectuala.

DECIMO SEXTA. Normativa de aplicación supletoria



Ao presente convenio seralle aplicable subsidiariamente a seguinte normativa:

- a) Real Decreto 1393/2007, do 29 de outubro polo que se establece a ordenación dos ensinos universitarios.
- b) Normativa do Plan de estudos da titulación.
- c) Normativa de practicas externas en empresas e institucións aprobada polo Consello de Goberno da Universidade de Santiago de Compostela o dia 30 de maio de 2008, ou normativa que a substitúa.
- d) Real Decreto 592/2014, de 11 de xullo, polo que se regulan as prácticas académicas externas dos estudantes universitarios.

En proba de conformidade, asínase este convenio en exemplar triplicado en todas as súas follas, para un só efecto, no lugar e a data que se indican a seguir:

Santiago de Compostela, 16 de abril de 2015.

Polo Parlamento de Galicia



Asdo.: Pilar Rojo Noguera
Presidenta

Pola Universidade de Santiago de
Compostela



Asdo.: Juan Viaño Rey
Reitor

Anexo

Obxecto do convenio	Convenio do Parlamento de Galicia coa Universidade de Santiago de Compostela para a realización de prácticas académicas externas <u>curriculares/extracurriculares</u> dos estudantes da Facultade de Dereito	
Institución na que se realiza a practica	Parlamento de Galicia	
Identificación do estudante	Nome	
	Apelidos	
	dni nº	
Identificación dos titores	- - - - - - - - - -	
Data inicio das practicas		
Data finalización das practicas		
Nº total de horas		
Proxecto formativo		
Bolsa ou axuda		
Seguro de cobertura		